



საქართველოს გარემოს დაცვისა და სოფლის მეურნეობის მინისტრი

ბრძანება N 2-856

24/09/2020

ქ. თბილისი

ტყიბულის მუნიციპალიტეტში, ქ. ტყიბულში ინდივიდუალური მეწარმე „მურადი ბოჭორიშვილის“ სასარგებლო წიაღისეულის - ქვის (ტემენიტი) გადამამუშავებელი საწარმოს მოწყობასა და ექსპლუატაციაზე სკრინინგის გადაწყვეტილების შესახებ

ინდივიდუალური მეწარმე მურადი ბოჭორიშვილის (პ/ნ 41001026924) მიერ, გარემოზე ზემოქმედების შეფასების საჭიროების დადგენის მიზნით, საქართველოს გარემოს დაცვისა და სოფლის მეურნეობის სამინისტროში წარმოდგენილია ტყიბულის მუნიციპალიტეტში, ქ. ტყიბულში ქვის (ტემენიტის) სამსხვრევ-დამხარისხებელი საწარმოს მოწყობისა და ექსპლუატაციის პროექტის სკრინინგის განცხადება.

წარმოდგენილი დოკუმენტაციით დგინდება, რომ ქვის (ტემენიტის) სამსხვრევ-დამხარისხებელი დანადგარის მოწყობა და ექსპლუატაცია დაგეგმილია ტყიბულის მუნიციპალიტეტში, ქ. ტყიბულში, ტყვარჩელის ქ. N18-ის მიმდებარე ტერიტორიაზე, ინდივიდუალური მეწარმე მურადი ბოჭორიშვილის საკუთრებაში არსებულ არასასოფლო-სამეურნეო დანიშნულების მიწის ნაკვეთზე (ს/კ 39.01.29.042). აღნიშნული ნაკვეთის GPS კოორდინატებია X - 333061, Y - 4688308; X - 333064, Y - 4688309; X - 333067, Y - 4688316; X - 333081, Y - 4688323; X - 333086, Y - 4688306; X - 333065, Y - 4688297. სკრინინგის განცხადების თანახმად, საწარმოს საპროექტო წარმადობა შეადგენს წელიწადში 240 ტ-ს. საწარმო იმუშავებს კვირაში 5 დღე, 8-საათიანი სამუშაო გრაფიკით და დასაქმდება 3 ადამიანი.

საპროექტო მიწის ნაკვეთი მდებარეობს სამრეწველო ზონაში, შპს „საქნახშირის“ ამაჟამად ამორტიზებული ელექტრომექანიკური საწარმოების კომპლექსის ტერიტორიაზე. საპროექტო ტერიტორიას გარს ეკვრის სახელმწიფოს საკუთრებაში არსებული არასასოფლო-სამეურნეო დანიშნულების მიწის ნაკვეთი. ჩრდილო-დასავლეთით, 45 მეტრის დაშორებით განთავსებულია შპს „ტექნიკური კომპანიის“ კუთვნილი სათავსო, რომელიც არ ფუნქციონირებს. ჩრდილოეთით, 15 მეტრის დაშორებით მდებარეობს მანანა ცქიფურიშვილისა და იური ბუბაშვილის არასასოფლო-სამეურნეო დანიშნულების მიწის ნაკვეთი, რომელზეც ფუნქციონირებს ქვის სახერხი საამქრო. ჩრდილო-აღმოსავლეთით, 28 მეტრში მდებარეობს თენგიზ ბუბაშვილის კუთვნილი არასასოფლო-სამეურნეო მიწის ნაკვეთი. ჩრდილოეთით, 65 მეტრზე განთავსებულია შპს „საქნახშირის“ კუთვნილი ნაგებობა, რომელიც არ ფუნქციონირებს. ტერიტორიის ჩრდილოეთით განთავსებულია წყალსაწრეტი არხი. უახლოესი საცხოვრებელი სახლი საპროექტო ტერიტორიიდან დაშორებულია 210 მეტრით, ხოლო აღმოსავლეთით, 170 მეტრის დაშორებით მიედინება მდინარე ტყიბულა.

სკრინინგის განცხადების თანახმად, ტექნოლოგიური პროცესის დროს დაგეგმილია ყებებიანი სამსხვრეველას, მიმწოდი ღარისა და დამხარისხებელი მბრუნავი საცერის გამოყენება. ნედლეულის სახით მოხდება ქვის ხერხვის შედეგად დარჩენილი ნატეხების

გამოყენება, რომელიც საწარმოს ტერიტორიაზე შემოიზიდება ავტომანქანით. ნედლეული განთავსდება ბაქანზე, საიდანაც ხელით მიეწოდება ქვის სამსხვრევ დანადგარს. დამსხვრეულ მასა ღარის მეშვეობით გადაინაცვლებს მბრუნავ საცერში, გაცრის შედეგად მიღებული პროდუქცია განთავსდება ბაქანზე, საიდანაც დანიშნულებისამებრ გაიტანება ავტომანქანით. მიღებული პროდუქციის 70% იქნება 0-5 ფრაქცია, ხოლო 30% 5-10 და 10-18 ფრაქცია. ნედლეულის დამუშავება მოხდება მშრალი მეთოდით.

საწარმოს ექსპლუატაციის ეტაპზე მოსალოდნელია ატმოსფერულ ჰაერში დამბინძურებელი ნივთიერების - არაორგანული მტვრის გაფრქვევა. იდენტიფიცირებულია დაბინძურების 4 წყარო, საიდანაც წლიურად, 240 ტ ქვის გადამუშავების შედეგად, მოსალოდნელია 0,5719 ტ არაორგანული მტვრის გაფრქვევა. შესაბამისად, დღის განმავლობაში მოსალოდნელია 0,0024 ტ არაორგანული მტვრის გაფრქვევა.

საწარმოს ექსპლუატაციის ეტაპზე, ტექნოლოგიურ პროცესში ჩართული დანადგარებიდან მოსალოდნელია ხმაურის გავრცელება. სკრინინგის განცხადების თანახმად, სამსხვრევი დანადგარის ოპერირების პროცესში ხმაურის დონე შეადგენს 85 დბა-ს, ხოლო შესაბამისი გამოთვლებით, უახლოეს საცხოვრებელ სახლთან (210 მ) ხმაურის დონე იქნება 39,98 დბა. წარმოდგენილი დოკუმენტაციის მიხედვით, ვინაიდან საცხოვრებელი სახლის კაპიტალური კედლის ეფექტურობა შეადგენს 10-15 დბა-ს და საპროექტო ობიექტსა და საცხოვრებელ სახლს შორის განთავსებული კაპიტალური ნაგებობები ხელს უწყობენ ბგერით იზოლაციას, საცხოვრებელ სახლებში ხმაურის დონე არ გადააჭარბებს კანონმდებლობით დადგენილ ნორმას.

საქმიანობის განხორციელება დაგეგმილია არასასოფლო-სამეურნეო დანიშნულების მიწის ნაკვეთზე, რომელიც მრავალი წლის განმავლობაში სამეწარმეო დანიშნულებით გამოიყენებოდა. ლანდშაფტი მთლიანად ანთროპოგენურია და თავისუფალია ხე-მცენარეული საფარისაგან. საპროექტო ტერიტორია არ მდებარეობს ტყით დაფარული ტერიტორიების სიახლოვეს და მასზე არ ფიქსირდება წითელი ნუსხით დაცული სახეობები. ასევე, საწარმოს განთავსების ტერიტორია მდებარეობს ქუთაისი-ტყიბული-ამბროლაურის ავტომაგისტრალის აღმოსავლეთით, სადაც სატრანსპორტო ნაკადები დღე-ღამის განმავლობაში ინტენსიურია. ამდენად, ტერიტორიაზე მსხვილი ძუძუმწოვრების არსებობა ნაკლებსავარაუდოა. შესაბამისად, საწარმოს მოწყობისა და ექსპლუატაციის ეტაპზე ბიომრავალფეროვნებაზე ზემოქმედება მოსალოდნელი არ არის,

საწარმოში გამოიყენება მსხვრევის მშრალი მეთოდი. შესაბამისად, ობიექტზე საწარმოო მიზნით წყლის მოხმარება არ იგეგმება. სანიაღვრე-ჩამდინარე წყლები ჩაეშვება ტერიტორიის მიმდებარედ არსებულ საწრეტ არხში, რომელიც უკავშირდება ტერიტორიაზე არსებულ სხვა არხებს და ჩაედინება მდ. ტყიბულაში.

საწარმოს საქმიანობის ეტაპზე საქმიანობასთან დაკავშირებული ნარჩენების წარმოქმნა მოსალოდნელი არ არის. თუმცა, სკრინინგის განცხადების მიხედვით, ექსპლუატაციის ეტაპზე მოხდება ნარჩენების ინვენტარიზაცია და არსებობის შემთხვევაში შესაბამისი ნებართვის მქონე კომპანიისათვის გადაცემა.

საწარმოს მოწყობისა და ექსპლუატაციის ეტაპზე წარმოქმნილი საყოფაცხოვრებო ნარჩენების გატანა მოხდება ააიპ „ტყიბულის სპეციალურ სერვისებთან“ გაფორმებული ხელშეკრულების საფუძველზე, რომელიც უზრუნველყოფს საწარმოს ტერიტორიაზე სპეციალური კონტეინერის დადგმასა და ნარჩენების გატანას და განთავსებას გრაფიკის შესაბამისად.

სკრინინგის განცხადების თანახმად, საწარმოში ნედლეულის შემოტანა დაგეგმილია ქუთაისი-ტყიბული-ამბროლაურის საავტომობილო გზის გავლით, დაახლოებით ათ დღეში ერთხელ, მინიმუმ 10 ტ ტვირთამწეობის ავტოტრანსპორტის გამოყენებით და ასეთივე ინტენსივობით მოხდება მზა პროდუქციის გატანა. შესაბამისად, სატრანსპორტო ნაკადებზე მნიშვნელოვანი ზემოქმედება მოსალოდნელი არ არის.

სკრინინგის განცხადების მიხედვით, ობიექტის მოწყობისა და ექსპლუატაციის პროცესში ადამიანის ჯანმრთელობის დაზიანების რისკები ძირითადად დაკავშირებული იქნება ავტოტრანსპორტის ერთმანეთთან შეჯახების ან უსაფრთხოების წესების დარღვევის შემთხვევებთან. საწარმოს ექსპლუატაციის პროცესში საწარმოში დაცული იქნება შრომის უსაფრთხოების ნორმები მოქმედი კანონმდებლობის შესაბამისად, შესაბამისად, ავარიული სიტუაციებისა და ადამიანის ჯანმრთელობასა და უსაფრთხოებაზე რისკები იქნება მინიმალური.

საპროექტო ობიექტის მიმდებარედ ფუნქციონირებს ქვის სახერხი საწარმო. აღნიშნული საწარმოს პროფილიდან გამომდინარე, გარემოზე კუმულაციური ზემოქმედება მოსალოდნელია ატმოსფერულ ჰაერში მავნე ნივთიერებების ემისიებისა და ხმაურის გავრცელების კუთხით. აგრეთვე, ატმოსფერულ ჰაერზე კუმულაციური ზეგავლენა მოსალოდნელია ავტოტრანსპორტის მოძრაობის შედეგად გამოწვეული ამტვერებისას. წარმოდგენილი დოკუმენტაციის თანახმად, ვინაიდან აღნიშნულ საწარმოში ქვის ხერხვის პროცესი სველია, ხოლო საპროექტო ობიექტის ფუნქციონირებისას წარმოქმნილი მტვრის რაოდენობა უმნიშვნელო (0,0024ტ/დღე), ატმოსფერულ ჰაერში მავნე ნივთიერებათა მიწისპირა კონცენტრაციების ნორმირებულ მაჩვენებლებზე გადაჭარბება მოსალოდნელი არ იქნება. სკრინინგის ანგარიშის თანახმად, ჩატარებული გაზომვების მონაცემებით, მოსალოდნელი ხმაურის კუმულაციური დონე არ გაააჭარბებს კანონით დადგენილ ნორმას.

„გარემოსდაცვითი შეფასების კოდექსის“ მე-7 მუხლის მე-5 ნაწილის შესაბამისად, სკრინინგის განცხადება გამოქვეყნდა სამინისტროს ოფიციალურ ვებგვერდზე და ტყიბულის მუნიციპალიტეტის მერიის საინფორმაციო დაფაზე. საზოგადოების მხრიდან აღნიშნულ საქმიანობასთან დაკავშირებით წერილობითი შენიშვნები და მოსაზრებები არ ყოფილა წარმოდგენილი.

წარმოდგენილი სკრინინგის განცხადებით დგინდება, რომ დაგეგმილი საქმიანობის ადგილმდებარეობისა და საქმიანობის მასშტაბების გათვალისწინებით, სასარგებლო წიაღისეულის - ქვის (ტეშენიტის) გადამამუშავებელი საწარმოს მოწყობა და ექსპლუატაცია გარემოზე მნიშვნელოვან ზემოქმედებას არ გამოიწვევს.

ზემოაღნიშნული კრიტერიუმების გათვალისწინებით, „გარემოსდაცვითი შეფასების კოდექსის“ მე-7 მუხლის მე-6 ნაწილისა და ამავე კოდექსის II დანართის მე-5 პუნქტის 5.1. ქვეპუნქტის საფუძველზე,

ვ ბ რ ძ ა ნ ე ბ:

1. მიღებულ იქნეს სკრინინგის გადაწყვეტილება, რომ ტყიბულის მუნიციპალიტეტში, ქ. ტყიბულში ინდივიდუალური მეწარმე „მურადი ბოჭორიშვილის“ სასარგებლო წიაღისეულის - ქვის (ტეშენიტი) გადამამუშავებელი საწარმოს მოწყობა და ექსპლუატაცია არ დაექვემდებაროს გარემოზე ზემოქმედების შეფასებას;
2. ინდივიდუალური მეწარმე „მურადი ბოჭორიშვილი“ ვალდებულია საქართველოს კანონის „გარემოსდაცვითი შეფასების კოდექსის“ მე-7 მუხლის მე-8 ნაწილის

შესაბამისად უზრუნველყოს გარემოსდაცვითი ტექნიკური რეგლამენტით დადგენილი მოთხოვნებისა და გარემოსდაცვითი ნორმების დაცვა;

3. ბრძანება დაუყოვნებლივ გაეგზავნოს ინდივიდუალურ მეწარმე „მურადი ბოჭორიშვილს“;
4. ბრძანება ძალაში შევიდეს ინდივიდუალური მეწარმე „მურადი ბოჭორიშვილის“ მიერ ამ ბრძანების გაცნობისთანავე;
5. სკრინინგის გადაწყვეტილების გაცემიდან 5 დღის ვადაში აღნიშნული გადაწყვეტილება განთავსდეს სამინისტროს ოფიციალურ ვებგვერდზე და ტყიბულის მუნიციპალიტეტის აღმასრულებელი ორგანოსა და წარმომადგენლობითი ორგანოს საინფორმაციო დაფაზე;
6. ბრძანება შეიძლება გასაჩივრდეს თბილისის საქალაქო სასამართლოს ადმინისტრაციულ საქმეთა კოლეგიაში (თბილისი, დ. აღმაშენებლის ხეივანი, მე-12 კმ. N6) მხარის მიერ მისი ოფიციალური წესით გაცნობის დღიდან ერთი თვის ვადაში.

ლევან დავითაშვილი



მინისტრი